

In cumbat politic a donn e cust da la cultura?

Il comité d'iniziativa «Chantun da cultura Grischun» ha drizzà in appell urgent al cussegli grond

DA MARTIN CABALZAR

L'emna proxima vegn il cussegli grond a s'occupar da la revisun totala da la lescha da cultura. Tenor l'incumbensa dal parlament duai la nova lescha purtar ina nova valitazion da las activitads culturalas ed avrir novas perspectivas per il chantun Grischun. Avant la debatta parlamentara che cumenza glindesdi proxim en il cussegli grond regia dentant gronda disunitad tant entaifer la cumissiun prede-liberanta da furmaziun e cultura sco en las diversas fracciuns. Ils exponents da la cultura teman uss che lur basegn urgent per in rinforzament substanzial da la cultura vegnia surduvrà per in cumbat politic.

Iniziativa Chantun da cultura Grischun

Sco quai che *Nikolaus Schmid* ha declarà a La Quotidiana han ins fundà il december passà l'iniziativa «Chantun da cultura Grischun» cun la finamira da rinforzar las activitads culturalas e da dar al chantun muntagnard novas perspectivas. Cun la «Festa da la cultura grischuna» che ha già lieu l'entschatta schaner en la sala dal cussegli grond han exponents da las differentas spartas culturalas e da las trais linguis chantunales probabel cooperà per l'emprima giada en l'istorgia grischuna en in event communabel. Las medias han schizunt celebrà questa scuntrada sco nova èra da la cooperaziun culturala entaifer noss chantun.

Grondas divergencias

A la cumissiun per furmaziun e cultura ch'è s'occupada durant trais dis cun la nova lescha da cultura n'esi betg reussi da chattar in consens. Il cuntrari. In grond dumber da propostas da maioritat e mi-



Gronda manifestaziun dals pli divers acturs ed exponents da la cultura a la «Festa da la cultura grischuna» en la sala dal cussegli grond.

FOTO O. ITEM

noritad tradischa las differenzas d'avis tar ils commembers da la cumissiun.

Anc pli fitg divergeschan las pusiziuns da las partidas. Entant che la Partida socialdemocratica (ps) sustegn anc adina il credit da rom proponì oriundamain per cuntanscher ina finanziazion che lubescha da planisar a lunga vista, insista la Partida cristianodemocratica (pcd) sin l'elavuraziun d'in concept strategic che duai furmar la baza per definir il volumen finanziel. Anc pli lunsch va la tenuta da la Partida burgais-democratica (pbd) che vul renviar la lescha a la regenza e che critigescha la mancanza d'ina strategia da

cultura. La tenuta da la pbd chatta era numerus adherents en las retschas da la Partida liberaldemocratica (pld).

«La lavor culturala è pericilitada»

Il comité d'iniziativa «Chantun da cultura Grischun», dal qual fan part representants da tut las spartas ed uniuns, ha tenor *Nikolaus Schmid* tema ch'il cumbat politic gjaja a donn e cust da la cultura. Il comité beneventia da princip ina debatta engaschada en tut las partidas, el temia ina discussiun che ignoresschia ils basegns essenzials, di Schmid. Il

Grischun dovria in sostegn substanzial da l'entir spectrum cultural che vegn realisà tant d'amaturs e professiunals, da gruppas libras ed instituziuns etablididas, museums e festivals, scolas da musica ed autres instituziuns che s'occupan da la furmaziun, organisaziuns linguisticas ed uniuns culturalas. Senza mesiras da promozion concretas e bain definidas na possia la cultura betg sa sviluppar e sa madirar en noss chantun.

Appel urgent al parlament

Suenter che las discussiuns hist e host han cuzzà mais è il comité d'iniziativa

preoccupà da la situaziun embruglianta e drezza perquai in appell urgent al cussegli grond che sa raduna l'emna proxima a Cuira. Il comité punctuescha che las activitads culturalas singularas da noss chantun sajan in dals pli gronds potenzials. En in chantun muntagnard sappia quest potenzial dentant be sa sviluppar sch'el vegnia promovì e sostegni a moda substanziala. Tenutas e pusiziuns politicas divergentas na dastgian betg effectuar ch'ils basegns legitims dals acturs culturals vegnian unfrids sin l'altar dal cumbat politic.

Commembers dal comité d'iniziativa

Andy Kolleger, Uniun da musica cantunala e deputau; Pascal Werner, Fundaziun da fotografias dal Grischun; Jacqueline Giger Cahannes, Filharmonia da combra dal Grischun; Christof Rösch, Fundaziun Nairs; Ute Haferburg, Teater Cuera; Lucretia Bärtsch, Uniun da chant chantunala; Nikolaus Schmid, ACT Grischun lobby culturala; Karin Niederberger, Uniun da sgugialaders federala; Gaby Thomann, deputada e commembra KBK, Andreas Gabriel, Lia Rumantscha; Felix Dietrich, hotelier e Cumissiun da cultura Engiadina S. Murezzan; Sandra Locher Benguerel, deputada e vicepresidenta KBK; Roman Weishaupt, Teater giuven grischun; Andreas Leisinger, Museums ed archivs culturals GR; Giovanni Netzer, intendant Origen; Giuseppe Falbo, PGI; Christian Klucker, Incantanti; Manuel Mark, Uniun federala per la musica populara.